




Filipino

Unang Markahan - Modyul 5: Maikling Kuwento mula sa France (Panitikang Mediterranean)



Filipino – Ikasampung Baitang Alternative Delivery Mode Unang Markahan (Panitikang Mediterranean) – Modyul 5: Maikling Kuwento mula sa France Unang Edisyon, 2020

Isinasaad sa Batas Republika 8293, Seksiyon 176 na: Hindi maaaring magkaroon ng karapatang-sipi sa anomang akda ang Pamahalaan ng Pilipinas. Gayonpaman, kailangan muna ang pahintulot ng ahensiya o tanggapan ng pamahalaan na naghanda ng akda kung ito ay pagkakakitaan. Kabilang sa mga maaaring gawin ng nasabing ahensiya o tanggapan ay ang pagtakda ng kaukulang bayad.

Ang mga akda (kuwento, seleksiyon, tula, awit, larawan, ngalan ng produkto o *brand name*, tatak o *trademark*, palabas sa telebisiyon, pelikula, atbp.) na ginamit sa modyul na ito ay nagtataglay ng karapatang-ari. Pinagsumikapang matunton ang mga ito upang makuha ang pahintulot sa paggamit ng materyal. Hindi inaangkin ng mga tagapaglathala at mga mayakda ang karapatang-aring iyon. Ang anomang gamit maliban sa modyul na ito ay kinakailangan ng pahintulot mula sa mga orihinal na may-akda ng mga ito.

Walang anomang parte ng materyal na ito ang maaaring kopyahin o ilimbag sa anomang paraan nang walang pahintulot sa Kagawaran.

Inilathala ng Kagawaran ng Edukasyon

Kalihim: Leonor Magtolis Briones

Pangalawang Kalihim: Diosdado M. San Antonio

Bumuo sa Pagsusulat ng Modyul

Manunulat: Flora M. Leiza, Alvin D. Mangaoang

Editor: Luisito V. Libatique

Tagasuri: Arabella May Z. Soniega, Virgilio C. Boado, Gina A. Amoyen

Editha T. Giron, Gemma Erfelo, Rowena Abad, Maria Teresita R.

Gapate, Renato R. Santillan

Tagaguhit: Rodel R. Rimando, Ernesto F. Ramos Jr., Robin Ace T. De

Guzman

Tagalapat: Alvin D. Mangaoang

Tagapamahala: Tolentino G. Aquino, Atty. Donato D. Balderas Jr., Arlene A. Niro,

German E. Flora, Gina A. Amoyen, Editha T. Giron, Virgilio C.

Boado, Alejo R. De Sesto

Inilimbag sa	Pilipinas	ng	
•	•	_	

Department of Education – Region I

Office Address: Flores St., Catbangen, City of San Fernando, La Union

Telefax: (072) 682-2324; (072) 607-8137

E-mail Address: region1@deped.gov.ph

10

Filipino

Unang Markahan – Modyul 5: Maikling Kuwento mula sa France (Panitikang Mediterranean)



Paunang Salita

Ang Self-Learning Module o SLM na ito ay maingat na inihanda para sa ating mag-aaral sa kanilang pag-aaral sa tahanan. Binubuo ito ng iba't ibang bahagi na gagabay sa kanila upang maunawaan ang bawat aralin at malinang ang mga kasanayang itinakda ng kurikulum.

Ang modyul na ito ay may inilaang Gabay sa Guro/Tagapagdaloy na naglalaman ng mga paalala, pantulong o estratehiyang magagamit ng mga magulang o kung sinomang gagabay at tutulong sa pag-aaral ng mga mag-aaral sa kanikanilang tahanan.

Ito ay may kalakip na paunang pagsusulit upang masukat ang nalalaman ng mag-aaral na may kinalaman sa inihandang aralin. Ito ang magsasabi kung kailangan niya ng ibayong tulong mula sa tagapagdaloy o sa guro. Mayroon ding pagsusulit sa bawat pagtatapos ng aralin upang masukat naman ang natutuhan. May susi ng pagwawasto upang makita kung tama o mali ang mga sagot sa bawat gawain at pagsusulit. Inaasahan naming magiging matapat ang bawat isa sa paggamit nito.

Pinapaalalahanan din ang mga mag-aaral na ingatan ang SLM na ito upang magamit pa ng ibang mangangailangan. Huwag susulatan o mamarkahan ang anumang bahagi ng modyul. Gumamit lamang ng hiwalay na papel sa pagsagot sa mga pagsasanay.

Hinihikayat ang mga mag-aaral na makipag-ugnayan agad sa kanilang guro kung sila ay makararanas ng suliranin sa pag-unawa sa mga aralin at paggamit ng SLM na ito.

Sa pamamagitan ng modyul na ito at sa tulong ng ating mga tagapagdaloy, umaasa kaming matututo ang ating mag-aaral kahit wala sila sa paaralan.



Magandang araw sa iyo minamahal kong mag-aaral! Batid kong ikaw ay handang-handa na at may pananabik na mag-aral at matuto. Kung gayon, ikaw ay maghanda na sa mga susunod na araling ating pag-aaralan.

Sa **Modyul 5** ay iyong mababatid ang isang maikling kuwentong pinamagatang "Ang Kuwintas" ni Guy de Maupassant na nagmula sa bansang France. Ang bansang France ay matatagpuan sa Timog na bahagi ng Europe. Ang pangalang France ay galing sa salitang Latin na "*Francia*" na ang ibig sabihin at "Lupain ng mga *Franks*". Bago pa man nakilala sa katawagang France, kinilala ito sa katawagang Gaul.

Magugunita na ang kultura ng France ay naimpluwensiyahan ng Celtic at Gallo-Roman Culture, gayon din ang Franks, isang tribong German. Sa kasalukuyan, kitang-kita sa kultura ng mga taga-France ang sopistikasyon at matinding patriyotismo lalo na sa Paris, kabisera nito na kinikilalang sentro ng fashion (nauuso, moda, porma at rampa) sa buong mundo.

Sikapin mong tuklasin kung masasalamin ba sa katauhan ng mga tauhan ang pag-uugali ng mga tao sa bansang pinanggalingan nito. Huhubugin din ang iyong kasanayan sa paggamit ng mga panghalip bilang panuring sa tauhan upang ikaw ay makapagsalaysay ng nabuong sariling wakas ng kuwento.

Sa pag-aaral sa modyul na ito, inaasahang matatamo mo ang sumusunod:

Mga Pinakamahahalagang Kasanayang Pampagkatuto (MELC)

- 1. Naipaliliwanag ang ilang pangyayaring napakinggan na may kaugnayan sa kasalukuyang mga pangyayari sa daigdig. **(F10PN-If-g-66)**
- 2. Nakapagbibigay ng mga halimbawang pangyayari sa tunay na buhay kaugnay ng binasa. **(F10PB-If-g-67)**
- 3. Nabibigyang-kahulugan ang mahihirap na salita o ekspresyong ginamit sa akda batay sa konteksto ng pangungusap. **(F10PT-If-g-66)**
- 4. Nagagamit ang angkop na mga panghalip bilang panuring sa mga tauhan. (F10WG-If-g-61)

Halika na't tawirin natin ang dagat ng Mediterranean at tuklasin ang kultura ng mga taga-France sa tulong ng kanilang maikling kuwento.



Bago tayo dumako sa ating talakayan tungkol sa maikling kuwento, magkakaroon muna tayo ng paunang pagtataya upang malaman ang iyong inisyal na kaalaman hinggil sa paksang tatalakayin.

PAUNANG PAGTATAYA

A. Panuto: Pakinggang mabuti ang tekstong nakakahon sa ibaba na babasahin ng iyong kapamilya at pagkatapos ay sagutin ang mga kasunod na tanong batay sa iyong napakinggan. Isulat ang sagot sa iyong sagutang papel.

Labis ang pagsisisi ni Jose habang kumakain sa hapag ng agahan. "Bakit! Bakit pa ba ako isinilang – kung ganito lamang ako. Sana'y namatay na lang ako" sambit nito sa kaniyang sarili habang pilit na isinusubo ang kaning may ilang butil ng asin sa kaniyang plato. Mariing pinagmamasdan ng kaniyang inay na kararating pa lang upang kunin ang paglalabhan sa kabilang bahay.

"Ano ba naman 'yan Jose, ang kanin matatapon! Umayos ka nagpapakahirap na nga ako sa paglalabada'y pinaglalaruan mo lamang ang kaning 'yan. Tandaan mo anak, ang bawat grasyang nakahain diyan sa hapag ay galing sa aking pawis. Sana'y maawa ka naman", pagpapaliwanag ng kaniyang magulang.

Halaw mula sa akdang "Kabuluhan ng Buhay" ni: Emmar C. Flojo (Bahagi lamang)

1.	Ano kayang estado sa buhay ang nararanasan ng mag-ina sa napakinggang akda?
2.	Bakit kaya nagrereklamo ang anak? Ipaliwanag.
3.	Anong kasalukuyang pangyayari sa daigdig ang maaaring maiugnay sa kalagayan ng buhay na mayroon ang mag-ina? Ipaliwanag.
4.	Kung ikaw ang ina sa napakinggang akda, paano mo haharapin ang ganitong suliranin sa buhay? Bigyang-paliwanag ang sagot.
5.	Paano kaya mabibigyang-kalutasan ang ganitong pangyayari sa kasalukuyan? Ipaliwanag ang iyong sagot.

B. Panuto: Basahing mabuti ang kasunod na bahagi ng akda at pagkatapos ay magbigay ng limang mga halimbawang pangyayari sa tunay na buhay kaugnay ng binasa. Isulat sa sagutang papel ang iyong sagot.

"Mas mabuti pa ang aking kaibigan naiintindihan ako, eh ikaw 'nay, ni wala ka na ngang oras para sa akin. Basta lang mapakain mo lang ang iyong anak ay tama na sa iyo 'yon". Tumayo si Jose at kinuha nito ang bag sabay nilisan nito ang bahay papuntang eskuwelahan.

Sa bukana pa lamang ng eskwelahan ay nakasalubong ni Jose sina Brando at mga kaibigan nito. "Halika na pare, sumama ka na sa amin", wika ni Brando. Walang pag-aalinlangan tumugon siya sa paanyaya nito dahil sa nangyaring pagtatalo nito sa kaniyang inay. Gusto niyang makalasap ng ibang ihip ng hangin na magdadala sa kaniya ng pagkalimot sa nangyari sa kanilang mag-ina.

Halaw mula sa akdang "Kabuluhan ng Buhay" ni: Emmar C. Flojo (Bahagi lamang)

- C. Panuto: Pansinin ang mga salitang nakasalungguhit sa bawat pangungusap. Ibigay ang kahulugan ng mga mahihirap na salita o ekspresiyong ginamit sa akda batay sa konteksto ng pangungusap. Isulat sa sagutang papel ang iyong sagot.
 _____1. "Lubhang nalibang si Mathilde sa pakikipagsayaw kaya't mag-iikapat
 - na ng madaling araw nang silang mag-asawa'y umuwi. Tanging isang lumang <u>dokar</u> na lamang ang kanilang nasakyan." Ang dokar ay isang ______ 2. "O, <u>kahabag-habag</u> kong kaibigan! Ang ipinahiram ko sa iyong
 - kuwintas ay imitasyon lamang."

 3. Sinubok niyang isuot ang hiyas sa harap ng salamin, nagbabantulot
 - siya at hindi mapagpasiyahan kung ang mga iyon ay isasauli o hindi.

 _____ 4. May taglay siyang <u>alindog</u> na hindi nababagay sa kasalukuyan niyang kalagayan sa buhay.
 - _____ 5. Kung kani-kanino sila nanghiram, lumagda sa mga kasulatan, pinasok at pumatol sa lahat ng uri ng manghuhuthot.
- D. Panuto: Basahing mabuti ang kasunod na talata. Gamitan ng angkop na panghalip bilang panuring sa mga tauhan ang mga patlang upang mabuo ang diwa ng talata. Isulat ang sagot sa iyong sagutang papel.

Sina Impen at Ogor ay mahigpit na magkaaway. Lagi 1				
nagkikita sa posong igiban. 2.	madalas makikita ang mga			
agwador na tulad nila. Madalas na nat	utukso si Impen dahil sa kulay ng			
3 balat. Ito ang dahilar	n kung bakit ayaw sa 4.			
ni Ogor at sanhi ng 5.	matinding basag-ulo. May pag-asa pa			
kayang magkasundo ang dalawa?				

Mahusay! Nagawa mo ang paunang pagtataya upang malaman ang iyong kaalaman hinggil sa ating mga mapag-aaralan. Huwag kang mag-alala kung mababa man ang iskor na iyong nakuha. Pagkatapos ng araling ito ay tiyak na mapauunlad mo pa iyan at marami kang matututuhan. Dagdagan mo lang ang pagsisikap habang tayo'y nagpapatuloy.

Aralin 1.1

Maikling Kuwento mula sa France Panitikan: Ang Kuwintas




Balikan

Sa nakaraang modyul, natalakay natin ang kahulugan ng epiko at ang mga hudyat sa pagsusunod-sunod ng mga pangyayari. Nabatid nating ang epiko ay isang akdang nagpapakita ng kabayanihan at pakikipagsapalaran ng pangunahing tauhan. Bilang pagbabalik-tanaw sa kasanayan sa nakaraang modyul, inaasahang isasagawa mo ang gawain gamit ang konsepto ng mga panandang pandiskurso. Tara na't magsimula na tayo.

Gawain 1: Pagsusunod-sunod ng mga Pangyayari

Panuto: Ibuod ang mga pangyayaring naganap sa Epiko ni Gilgamesh sa tulong ng mga hudyat sa pagsusunod-sunod ng mga pangyayari. Kopyahin ang grapikong presentasyon sa inyong sagutang papel.



Mahusay! Puspusan mong nagawa ang unang gawain. Ngayon, mahalaga ring masulyapan mo ang tekstong "Kultura ng France: Kaugalian at Tradisyon" upang mabigyan ka ng kabuoang pananaw tungkol sa kanilang kultura at higit mong maunawaan ang paggamit ng panghalip sa pagbibigay-turing sa tauhan.



Narito ang isang maikling kuwento mula sa France. Basahin ito at unawain nang mabuti upang matuklasan ang mensaheng nais ipahiwatig ng akda. Makatutulong din ito sa pagsagot mo sa mga susunod pang gawain. Pag-aralan kung masasalamin sa katauhan ng mga tauhan ang pag-uugali ng mga taga-France, ang pinagmulan ng akda.

Ang Kuwintas

ni Guy de Maupassant muling isinalaysay ni Flora M. Leiza

Si Mathilde ay isang maganda at mapanghalinang babae ngunit siya ay isinilang na mahirap. Pumayag siyang pakasal sa isang abang tagasulat sapagkat walang paraan upang siya'y makilala.

Sa kaniyang paniniwala ang katulad niyang maganda ay hindi nababagay sa kahirapang kaniyang hinahaharap kung kaya siya ay labis na nagdurusa.

Isang gabi, masayang dumating ang kaniyang asawang si G. Loisel na may dalang sobre na naglalaman ng paanyaya sa isang kasiyahan mula sa Ministro ng Instruksiyon Pampubliko. Ngunit sa halip na matuwa si Mathilde, padabog niyang inihagis ang sobre sa mesa at bumulong na ano ang gagawin niya rito. Ipinaliwanag ni G. Loisel na piling-pili lamang ang nabigyan ng paanyaya at nais lamang niyang malibang ang asawa. Natigilan siya nang mapansin niyang umiiyak ang asawa. Tinanong niya ito kung bakit. Sinabi ni Mathilde na ipamigay na lamang niya ang paanyaya sa iba. Hindi siya makadadalo dahil wala naman siyang maisusuot na bestida. Tinanong ni G. Loisel kung magkano ang halaga ng bestida. Dali-daling gumawa ng pagtataya si Mathilde at sinabi niyang nasa



Muling iginuhit ni Rodel R. Rimando (2020). Larawan ni Mathilde

apat na raang Pranko ito. Namutla ang lalaki sa kaniyang narinig, magagamit pa sana niya ang halagang ito sa pagbili ng baril pang-ibon ngunit sa huli, ibinigay pa rin niya ang pera sa asawa para makabili na ito.

Malapit na ang araw ng kasiyahan ngunit tila malungkot pa rin si Mathilde. Mabuti pa'y hindi na lang daw siya dadalo dahil magmumukha siyang kawawa sapagkat wala man lang siyang hiyas na maisusuot. Biglang naisip ni G. Loisel ang kaibigan ni Mathilde na si Madame Forestier para sa kaniya na lamang muna siya humiram ng alahas. Napasigaw si Mathilde sa tuwa kaya kinaumagahan, nagtungo siya sa kaniyang kaibigan at siya naman ay pinahiraman nito ng isang kuwintas.

Sumapit na ang inaasam na araw ng kasiyahan. Nagtagumpay si Mathilde sapagkat nahigitan niya ang lahat ng mga babae sa ganda, rangya at sa pagiging kahali-halina. Kung kaya siya ay naging maligaya nang gabing iyon.

Napako sa kaniya ang tingin ng mga kalalakihan at lahat sila'y nagnanais siyang isayaw. Mag-iikaapat na ng madaling araw nang silang mag-asawa ay umuwi.

Sa kanilang paghahanap ng masasakyan, ibinalabal ni G. Loisel ang isang abang pangginaw sa asawa. Dinamdam ni Mathilde ang pagkakaroon nito kaya agad siyang tumalilis upang hindi siya mapansin ng ibang kababaihang may magagarang balabal. Nahirapan silang maghanap ng masasakyan dahil madaling araw na't kapwa na sila nanginginig sa lamig. Sa wakas, nakahanap na sila ng isang matatandang dokar (kalesa) na ikinahihiya pa ni Mathildeng sakyan.

Nakarating na sila sa kanilang tahanan. Tapos na ang maliligayang sandali kay Mathilde. Sa lalaki naman, wala siyang iniisip kundi kailangan niyang makasapit sa Kagawaran sa ganap na ika-10:00 ng umaga. Nang humarap si Mathilde sa salamin upang muling makita ang kaniyang kagandahan, siya ay napasigaw sapagkat ang kuwintas na kaniyang hiniram ay wala sa kaniyang leeg. Sinabi niya sa kaniyang asawa na nawawala ang kuwintas.

Hinanap nila ang kuwintas ngunit ito ay hindi nila makita. Bumalik din ang lalaki sa mga lugar na kanilang pinuntahan. Sa kaniyang pagbalik, hindi pa rin niya ito nakita. Nanlumo si Mathilde sa ibinalita ng asawa. Sa harap ng gayong nakagigimbal na pangyayari, si Mathilde ay maghapong naghihintay na sapupo ng di-matingkalang pangamba. Bumalik kinagabihan ang lalaki, pagod na pagod, namumutla at nanlalalim ang mga mata. Hindi niya natagpuan ang kuwintas. Pinayuhan ng lalaki ang asawa na sumulat sa kaibigan nito at sabihing nabali ang sarahan ng kuwintas at kasalukuyan pang ipinagagawa upang magkapanahon silang makapag-isip-isip. Ginawa naman ng babae ang payo ng asawa.

Pagkalipas ng isang linggo ay lubusan na silang pinanawan ng pag-asa. Sa maikling panahong iyon, si Mathilde ay tila tumanda ng limang taon. Nagpahayag ang lalaki sa asawa na kailangang isipin nila kung paano mapapalitan ang nawalang kuwintas. Kinabukasan, ang mag-asawa'y nagtungo sa tanggapan ng alaherong nakasulat ang pangalan at direksyon sa loob ng kahon ng kuwintas. Hinanap ng alahero sa kaniyang talaan ang sinasabing kuwintas ngunit bigo silang makahanap nito.

Pinuntahan ng mag-asawa ang lahat ng mga maghihiyas upang makakita ng katulad ng nawala, na ang anyo ay buong pagsisikap na inalala samantalang kapwa sila nanlulupaypay sa pagkabigo at paghihirap ng kalooban. Nakatagpo sila sa isang tindahan sa Palais Royal ng isang tuhog ng diyamanteng sa palagay nila ay katulad ng kanilang pinaghahanap na kuwintas. Nagkakahalaga ito ng apatnapung libong prangko, ngunit ibibigay na sa kanila sa halagang tatlumpu't anim na libo. Pinakiusapan ng mag-asawa ang may-ari ng tindahan na huwag munang ipagbili ang kuwintas sa loob ng tatlong araw.

Pinakiusapan din nila ang may-ari ng tindahan na kung sakaling bago magtapos ng buwan ng Pebrero ay makita nila ang nawawalang kuwintas, matapos nilang bayaran ang bagong kuwintas ay bibilhin itong muli ng may-ari ng tindahan sa halagang tatlumpu't apat na libong prangko. May namanang labingwalong libong prangko si Mathilde sa namatay na ama. Gayon din ang ginawa ng lalaki. Kung kani-kanino siya nanghiram, lumagda sa mga kasulatan, pinasok kahit na ang mga gipit na kasunduan, kumuha ng mga patubuan at pumatol sa lahat ng uri ng manghuhuthot.

Nang matipon na lahat ang halagang kinakailangan ay tinungo ni Mathilde ang tindahan ng kuwintas. Nang mabili na nila ang kuwintas ay dagli nila itong isinauli kay Madam Forestier na naging malamig ang pakikiharap sa kaniya.

Mula noon, lubos na naunawaan ni Mathilde ang mamuhay sa gitna ng matinding karalitaan. Nabigla man siya sa bagong papel na kailangan niyang gampanan ay tinanggap niya iyon at buong tatag na ginampanan. Dapat mabayaran ang napakalaki nilang pagkakautang. Pinaalis nila ang kanilang utusan, lumipat ng ibang tirahan, nagtiis sila sa pangungupahan sa isang maliit na silid sa kaituktukan ng isang bahay-paupahan.

Naranasan ni Mathilde ang mabibigat na gawain; ang nakayayamot na pangangasiwa sa kusina, paghuhugas ng mga pingggan, paglilinis ng mga kaldero at kawaling mamantika, paglalaba ng mga damit, mantel at pamunas. Ipinapanaog niya sa lansangan ang kanilang kakaning baboy sa tuwing umaga at nagpapanhik siya ng tubig na gamit nila sa itaas. Suot niya ang pananamit ng pangkaraniwang babae, siya'y nagtutungo sa tindahan ng prutas, de lata at sa magkakarne. Nakasabit sa isang braso ang basket, nakikipagtawaran siya, nilalait at ipinakikipaglaban ang kakarampot niyang pamalengke.

Matapos ang sampung taon, natapos na rin nila ang lahat ng kanilang utang. Kasama na ang mga tubong nagkapatong-patong. Mukhang matanda na si Mathilde, isa na siyang tunay na babae na mayroong maralitang buhay.

Isang araw ng Linggo, habang si Mathilde ay naglalakad sa Champs Elysees upang magliwaliw matapos ang mga gawaing bahay, nakita niya si Madam Forestier na may kasamang bata. Katulad pa rin ito ng dati na may taglay na panghalina. Binati niya ito ngunit siya ay hindi nito nakilala sapagkat malaki na ang ipinagbago ang kaniyang itsura. Isinisi niya kay Madam Forestier ang nangyari sa kaniya.

Sinabi niya sa kaniya ang nangyari. Ang pagkawala ng kuwintas at ang pagbili niya ng kapalit ng kuwintas ang naging dahilan ng kahirapang kaniyang pinagdaanan. Ngunit sinabi ni Madam Forestier na ang kaniyang ipinahiram ay isa lamang imitasyon. Ang pinakamataas na maihahalaga ay limang daang prangko lamang.

Maaaring panoorin ang buod ng kuwento sa link na ito: https://www.youtube.com/watch?v=SCUprYhoT6I

TTABTASZ A

Sa iyong pagbabasa ay maaari kang makakita ng mga salita na bago sa iyong pandinig, o mga salitang mahirap unawain. Upang hindi mahirapan sa mga salitang ito, narito ang isang gawain para sa pagpapalawak ng talasalitaan.

Gawain 2: Paglinang ng Talasalitaan

Panuto: Ibigay ang kahulugan ng mga salitang nakasalungguhit sa Hanay A ayon sa pagkakagamit sa pangungusap. Piliin at isulat ang letra ng sagot mula sa Hanay B sa iyong sagutang papel.

	HANAY A	HANAY B
1.	Sa pagmamasid niya sa babaeng Briton,	A. lungkot
	nakadarama siya ng <u>lumbay</u> sa kaniyang puso.	B. nagpapautan
2.	Nagulumihanang napahinto ang lalaki nang	nang ma
	makita niyang umiiyak ang kaniyang asawa.	mataas n
3.	O <u>kahabag-habag</u> kong Mathilde! Ang ipinahiram	tubo
	kong kuwintas ay imitasyon lamang.	C. kainggitan
4.	Labis ang pagmimithi niyang masiyahan siya,	D. kaawa-awa
	maging kahali-halina at <u>pangimbuluhan</u> ng ibang	E. naguluhan
	babae sa kasiyahan.	
5.	Nanghiram siya kung kani-kanino, lumagda sa	
	mga kasulatan at pumatol ng mga patubuan sa	
	lahat ng uri ng <u>manghuhuthot.</u>	

TTANIAND

Dagdag kaalaman...

Ang **pagbibigay-kahulugan sa isang salita batay sa konteksto ng pangungusap** ay nakabatay ang kahulugan sa paraan ng pagkakagamit ng salita sa pangungusap. Natutukoy ito sa tulong ng mga *context clues*. Pansinin ang iba't ibang paraan ng pagpapakahulugan sa salitang **tinapay** sa sumusunod na halimbawa.

Mga Halimbawa:

- a. Nakita kong iniabot ng bata ang **tinapay** sa batang lansangan.
- b. Kapag binato ka ng bato, batuhin mo ng **tinapay**.
- c. Si Hesus ay ang **tinapay** ng buhay dahil siya ang gumagabay sa mga tao.

Sa unang halimbawa, ang salitang **tinapay** ay ginamit sa pangungusap sa literal na paraan, ito ay nangangahulugang **isang pagkain**; sa ikalawang halimbawa, ang kahulugan ng **tinapay** batay sa pagkakagamit sa pangungusap ay **kabutihan** dahil ito ay ginamit sa paraang matalinghaga habang sa ikatlong halimbawa ang salitang **tinapay** ay nangangahulugang **gabay** at ginamit sa pangungusap sa paraang kontekstuwal.

Gawain 3: Pagbibigay-kahulugan

Panuto: Ang mga salitang initiman sa sumusunod na pangungusap ay mga mahihirap na salita o ekspresiyong ginamit sa akda. Bigyang-kahulugan ang mga ito batay sa konteksto ng pangungusap. Isulat ang iyong sagot sa sagutang papel.

- 1. Inilagay niya ang buong buhay niya sa alanganing katayuan, dahil sa mga hirap na maaari pa niyang kasapitan, nanggipuspos siya sa mga nakaambang pagdurusa na puspos ng **pagsasalat** at paghihirap.
- 2. **Nagbabantulot** siya at hindi mapagpasiyahan kung ang mga hiyas na iyon ay isasauli pa o hindi na.
- 3. May taglay siyang **alindog** na hindi nababagay sa kasalukuyan niyang kalagayan.
- 4. Naglalaro sa kaniyang **balintataw** ang anyo ng tahimik na tanggapang nasasabitan ng mamahaling kurtina.
- 5. Sa harap ng gayong nakagigimbal na pangyayari, si Mathilde ay maghapong naghihintay na **sapupo** ng pangamba.

Mahusay! Binabati kita sa pagsagot sa ating talasalitaan. Upang lubusan mong maunawaan ang akdang iyong binasa, makatutulong sa iyo ang pagsagot sa mga mahahalagang katanungan. Alam kong kayang-kaya mong sagutin ang sumusunod na katanungan dahil ikaw ay may malalim na pang-unawa.

Gawain 4: Pag-unawa sa Maikling Kuwento

Panuto: Sagutin ang sumusunod na mga tanong buhat sa binasang akda. Isulat ang sagot sa sagutang papel.

1.	Bakit hindi n	nasaya	si Mathilde	sa p	oiling ng	kaniy	ang asawa?		
2.	Ano ang hang Ipaliwanag.	garin ni	iya sa buhay	√? M	akatuwii	ran ba	ı ito sa kaniya	ang	kalagayan?
3.	Maituturing Ipaliwanag.	bang	pagsubok	sa	buhay	ang	naranasan	ni	Mathilde?

4.	Sa kasalukuyang nakikita? Patunaya		a katulad pa ba ni	Mathilde na iyong
5.	masasalamin sa k		g mga pangunahing gali mayroon ang mg nto.	-
Panut akdar	ng binasa.	g sagutang papel ar pangunahing tau	ng sumusunod na ka han sa kuwento s	_
	Tauhan	Katangiang Pisikal	Gawi/Aksiyon	Reaksiyon ng Ibang Tauhan
			maikling kuwento?	
0.			unasan ang ganiton	
4.	Nangyayari din b magpapatunay dite	_	nsa? Magbigay ng	mga pangyayaring
5.	sumusunod na ta baguhin? Isulat ito naman niya? Isula	anong. Anong kat o sa unang kuwinta t ito sa ikalawang k ng karanasan? Isu	as sa iyong papel parangian ni Mathilde s. Anong magandan tuwintas. Anong nat lat ito sa ikatlong	e ang gusto mong g katangiang taglay tutuhan ni Mathilde



KULTURA NG FRANCE: KAUGALIAN AT TRADISYON

Kadalasan ay ikinakabit ang kulturang Pranses sa Paris, na sentro ng moda, porma, nauuso, pagluluto, sining at arkitektura, subalit ang buhay sa labas ng lungsod ng mga ilaw ay ibang-iba at nagkakaiba sa bawat rehiyon.

Mga Wika sa France

French ang pangunahing wika ng 67.07 milyong mamamayan (pagtatantiyang Mayo 2020), subalit may iba pang wika ang mga rehiyon. Ang French, ang wikang opisyal ng France ay ang unang wika ng 87.2% ng populasyon.

Relihiyon ng France

➤ Kristianismo (Katoliko) ang pangunahing relihiyon ng France – tinatayang 51.1% ito ng populasyon, 39.6% naman ang walang relihiyon (atheism o agnosticism), 5.6% ang Islam, 2.5% ang iba pang relihiyon at 0.4% ang hindi makadesisyon sa kanilang paniniwala.

Pagpapahalaga ng mga taga-France

- Malaki ang pagpapahalaga ng mga taga-France sa kanilang bansa at pamahalaan at karaniwang nagagalit kapag nakaririnig ng negatibong komento tungkol sa kanilang bansa. Ang pag-uugali nilang ito ay karaniwang itinuturing ng mga turista, lalo na ng mga Amerikano, na kawalang-galang.
- Ang ekspresiyong "chauvinism" ay nagmula sa France. Ito ay anyo ng matinding patriyotismo at isang paniniwala sa pambansang kataasa-taasan at kaluwalhatian. Niyayakap ng mga taga-France ang estilo at sopistikasyon at ipinagmamalaki nila ang katotohanang kahit sa mga pampublikong lugar ay mala-maharlika sila.
- Ang mga taga-France ay naniniwala sa "egalite" na nangangahulugang pagkakapantay-pantay, at ito'y bahagi ng motto ng kanilang bansa: "Liberte, Egalite, Fraternite." Marami ang nagsasabi na mas pinahahalagahan nila ang pagkakapantay-pantay kaysa kalayaan at pagkakapatiran, ang dalawang huling salita sa kanilang motto.

Lutuin

Ang pagkain at alak ay sentro ng buhay sa lahat ng antas ng lipunan at maraming mga pagtitipon ang nagaganap sa isang marangyang hapunan. Palaging may tinapay sa bawat oras ng pagkain at karaniwan nang makakita ng mahabang tinapay na tinatawag na *crusty baguettes* na iniuuwi sa bahay. Ang keso ay mahalaga ring sangkap ng bawat pagkaing French.

Pananamit

Ang Paris ay kilala sa matataas na uri ng fashion houses; ang mga taga-France ay kilala sa hindi matatawarang mariringal na pananamit. Karamihan sa kanila ay sopistikado kung manamit, disente at sunod sa uso (professional and fashionable style), ngunit hindi sobra sa dekorasyon (overly fussy). Ang karaniwang damit nila ay mahahabang amerikana, terno, mga bandana (scarves) at berets o bilog at malalambot na sombrero.

Sining


Ang sining ay nasa lahat ng sulok ng France – lalo na sa Paris at iba pang pangunahing lungsod – at ang impluwensiyang Gothic, Romanesque Rococo at Neoclassic ay makikita sa maraming simbahan at iba pang pampublikong gusali.

Mga Piyesta at Pagdiriwang

➤ Ipinagdiriwang ng mga taga-France ang mga tradisyunal na piyesta ng mga Kristiyano tulad ng Pasko at Mahal na Araw. Inaalaala din nila ang May Day, kilala rin bilang Araw ng mga Manggagawa tuwing Mayo 1 at Araw ng Tagumpay sa Europa kapag Mayo 8 bilang pag-alaala sa pagtatapos ng pakikipaglaban sa Europa noong Ikalawang Digmaang Pandaigdig.

Gawain 6: Pag-uugnay sa Tunay na Buhay

Panuto: Mula sa nabatid na impormasyon hinggil sa "Kultura ng France: Kaugalian at Tradisyon", isa-isahin ang mga halimbawang pangyayari sa tunay na buhay na may kaugnayan sa binasang kuwento "Ang Kuwintas" gamit ang kasunod na grapikong presentasyon. Dagdagan pa ang mga kahon kung kinakailangan. Gawin ito sa hiwalay na sagutang papel



Mahusay! Matagumpay mong naisagawa ang unang gawain. Sa bahaging ito, basahin at unawain mo ang tungkol sa maikling kuwento ng tauhan upang matulungan ka sa pag-unawa sa babasahing kuwento mula sa France. Hinihinging magkaroon ka ng pokus sa pagbabasa upang maunawaan mo ito nang mabuti. Handa ka na ba?

Alam mo bang...

Maikling Kuwento ng Tauhan ang tawag sa isang uri ng kuwentong ang higit na binibigyang-halaga o diin ay ang kilos o galaw, ang pananalita at pangungusap at kaisipan ng isang tauhan?

- > Naglalarawan ito ng iisang kakintalan sa taong inilalarawan o pinapaksa.
- ➤ Kumakatawan siya sa kabuoan ng kuwento sa pamamagitan ng anomang nangingibabaw na idea o ng mga kabuluhan sa kuwento.
- Nangingibabaw rito ang isang masusing pag-aaral at paglalarawan sa tunay na pagkatao ng tauhan sa katha.

- Maraming paraan ang ginagamit ng may-akda sa paglalarawan ng buong pagkatao ng tauhan. Nasasalig ito sa kaniyang panloob na anyo ang isipan, mithiin, damdamin at gayon din sa kaniyang panlabas na anyo pagkilos at pananalita.
- Nakatutulong din sa pagpapalitan ng katauhan ang mga pag-uusap ng ibang tauhan sa kuwento tungkol sa kaniya. Ngunit sa pamamagitan na rin ng tauhan nagkakaroon ng pinakambisang paglalarawan ng katauhan at naipakikita ito sa kaniyang reaksiyon o saloobin sa isang tiyak na pangyayari.

Gawain 7: Kaalaman sa Maikling Kuwento

Panuto: Basahin at unawaing mabuti ang mga pahayag. Lagyan ng tsek () kung ang pahayag ay tumutugma sa katangian ng isang maikling kuwento ng tauhan at ekis (X) naman kung hindi. Isulat ang sagot sa iyong sagutang papel.

Ang maikling kuwento ng tauhan ay higit na nagbibigay-pokus sa kilos o galaw, pananalita at kaisipan ng pangunahing tauhan.
 Higit na binibigyang-pansin sa kuwento ang ganapan o tagpuan ng mga pangyayari.
 Nailalarawan ng may-akda ang pagkatao ng pangunahing tauhan sa pamamagitan ng kaniyang panloob na anyo.
 Ang panloob na anyo ng pangunahing tauhan ay nababatay sa kaniyang kilos at pananalita.
 Malaking tulong din ang usapan ng iba pang mga tauhan upang

Napakahusay! Binabati pa rin kita at nasagutan mo ang gawaing ito. Halina't magpatuloy sa pagbabasa. Alam kong lalo mo itong kawiwilihan.

maipakilala ang pangunahing tauhan sa ganitong uri ng kuwento.



Pagyamanin

Binabati kita sa iyong pagsisikap na masagutan ang mga katanungan. Pinatunayan mo na ikaw ay handa nang humarap sa mga pagsubok dahil ikaw ay nakarating sa bahaging ito ng ating pag-aaral.

Ngayon ay lalo pa nating pagyamanin ang iyong kaalaman sa Maikling Kuwento ng Tauhan. Iyong babasahin ang isa pang halimbawa ng Maikling Kuwento mula sa Pilipinas upang magkaroon ng paghahalintulad ng Maikling Kuwento mula sa France. Pakiusapan ang isang kapamilya na basahin para sa iyo ang buod nga akdang "Impeng Negro" at pakinggan mo itong mabuti upang maunawaan. Handa ka na ba? Magpatuloy ka na.

Impeng Negro (Buod)

ni Rogelio R. Sikat

Sa isang iskwater ay naninirahan si Impen at ang kaniyang ina at mga kapatid. Sa tuwing aalis ng bahay si Impen bilang isang agwador ay lagi siyang pinagbibilinan ng kaniyang ina na umiwas sa pakikipag-away lalo na kay Ogor.

Si Ogor ang siga sa lahat ng agwador sa kanilang lugar. Madalas nitong tuksuhin si Impen sanhi ng panlabas na anyo nito. Anak siya ng kaniyang ina sa isang Negrong Amerikano. Mayroon siyang kapatid na anak naman ng kaniyang ina sa isang Amerikanong puti kaya ganon na lamang ang pagtukso sa kaniya ng mga tao.

Isang araw sa kaniyang pag-iigib ay muli na naman siyang sinubukan ni Ogor. Pilit na isiningit ni Ogor ang balde nito kahit na si Impen na ang nasa pila. Nakiusap si Impen kay Ogor na hayaan na lamang siyang matapos ngunit hindi ito pumayag kaya naisip na lamang niyang umuwi.

Subalit sa kaniyang paglakad ay pinatid siya ni Ogor at tumama ang pisngi niya sa nabitiwang balde ng tubig. Dahil sa dugong dumaloy sa kaniyang pisngi ay agad nitong tiningala ang kaaway at tinawag ang pangalan nito. Nagulat si Ogor at mabilis siya nitong sinipa at gumulong siya sa mga balde. Nagpambuno ang dalawa. Nagtawanan ang mga tao. Bigla ang paglakas ni Impen. Sinipa ulit siya at sa akmang sisipa ay kinagat ni Impeng ang paa kaya't pumailalim si Ogor at si Impeng ang nasa ibabaw.

Pinaulanan niya ito ng mga suntok dahilan upang humina at sumuko. Natalo at napasuko niya si Ogor. Tumayo at tinignan ang mga tao, ang mga ito ay nahihiya na sa kaniya. Ganoon na lamang ang pagkamangha ng mga kapwa niya agwador. Dahil dito ay natuklasan niya ang kakaibang lakas na taglay at nadama ang tibay, katatagan at kapangyarihan. Sa pagkakataong ito, pangingilagan na siyang tuksuhin ng mga iyon. Sa gitna ng sikat ng araw, siya'y naging sugatang mandirigma na ang tangning hiling ay ang kapayapaan kahit na siya ay iba sa lahat.

Gawain 8: Pag-unawa sa Napakinggan o Nabasa


Panuto:	Batay	sa napak	ringgan	o nabasan	g buod	ng	maikling	kuwento,	sagutin	ang
sumusu	ınod na	tanong.	Isulat a	ang iyong s	agot sa	sag	gutang pa	pel.		

1.	Ano ang pinapaksa ng akda?
2.	Sino-sino ang mga tauhan sa kuwento. Ilarawan ang bawat isa.
3.	Bakit hindi nakapagpigil si Impen sa kaniyang galit laban kay Ogor?
4.	Kung ikaw si Impeng Negro, gagawin mo rin ba ang ginawa niyang paglaban kay Ogor? Bakit?
5.	Nagaganap pa ba ang mga pangyayaring binanggit sa akdang napakinggan sa totoong buhay? Magbigay ng mga halimbawang pangyayari.



Gawain 9: Dugtungan Mo!

Panuto: Dugtungan ang sumusunod na pangungusap. Isulat ang sagot sa sagutang papel.



Upang matiyak mo kung talagang naintindihan ang araling ating tinalakay sa mga nagdaang araw tungkol sa maikling kuwento ng tauhan, gawin kung ano ang hinihingi sa kasunod na gawain.

Gawain 10: Isalaysay Mo!

Panuto: Ikaw ay nasa ikatlong taon na ng iyong pag-aaral sa kolehiyo. Magsasagawa ng youth camp ang inyong paaralan na pangungunahan ng Supreme Student Government bilang isa sa mga gawain para sa mga mag-aaral ngayong bakasyon. Inanyayahan kang magsalaysay ng isang testimonya tungkol sa naging karanasan mo bago ka nakatapos ng Junior High School. Ang iyong testimoniya ay dapat taglayin ang sumusunod:

- a. may mga pangyayaring naranasan na nauugnay sa mga kasalukuyang pangyayari sa daigdig
- b. may mga halimbawang pangyayari sa tunay na buhay
- c. angkop sa iyong mga tagapakinig
- d. may aral o mensahe

Aralin 1.2

Wika at Gramatika: Panghalip Bilang Panuring sa Tauhan



Balikan

Binabati kita sa iyong masigasig na pagsagot sa mga katanungan sa nakaraang aralin. Sa bahaging ito, malalaman mo kung paano mabisang magagamit ang panghalip bilang panuring sa mga tauhan para sa isang mabisang pagsasalaysay. Ngunit kailangan mo munang sagutin ang kasunod na gawain bago tayo magpatuloy.

Gawain 1: Hanapin Mo!

Panuto: Balikan ang akdang "Ang Kuwintas", magtala ng limang (5) pangungusap na gumamit ng panghalip at bilugan ang mga ito at pagkatapos ay gamitin sa sariling pangungusap. Kopyahin ang call out sa sagutang papel at dito isulat ang iyong sagot.



Magaling na magaling! Nagawa mo ang gawain. Sa pagkakataong ito iyo namang babasahin ang isa pang halimbawang bahagi ng maikling kuwento upang masukat ang iyong kaalaman tungkol sa panghalip bilang panuring sa tauhan.



Mayaman ang ating bansa sa iba't ibang uri ng maikling kuwento. Narito ang isa pang halimbawa ng maikling kuwento ng tauhan na naging tanyag dahil sa magandang mensaheng mapupulot dito. Taglay nito ang mga mahahalagang pangyayaring may kaugnayan sa mga pangyayari sa kasalukuyan. Basahin mo ang buod nito at pagkatapos ay sagutin ang mga kasunod na katanungan.

Ang Kalupi (Buod)

ni Benjamin P. Pascual

Umagang-umaga pa lamang ay masayang-masaya na si Aling Marta. Magtatapos na kasi ang kaniyang anak na dalaga sa pag-aaral. Bitbit ang kaniyang sisidlan, siya ay nagtungo sa pamilihan upang bumili ng uulamin sa pananghalian at garbansos para sa kaniyang dalagang anak. Linggo ng umaga, siksikan na ang palengke. Maririnig ang ingay ng mga nagtitinda at mamimili. Nang dumating si Aling Marta sa panggitnang pasilyo, ay may nagmamadaling batang lalaki na nakabangga sa kaniya. Ang batang lalaki ay mukhang mahirap, makikita ito sa kaniyang kasuotan. Si Aling Marta ay nagalit kahit humingi na ng tawad ang batang lalaki.

Pagkatapos ng pangyayari, siya ay tumungo sa tindahan ni Aling Godyang. Noong siya ay magbabayad na, napansin niyang nawawala ang kaniyang pitaka. Agad niyang hinanap ang batang lalaki, ito ang pinaghihinalaan niyang nagnakaw ng kaniyang pitaka. Nakita niya ang batang lalaki sa karatig na estasyon ng pulis. Agad siyang lumapit at hinatak ang bata sa leeg. Itinanggi ng bata ang akusasyon, sila'y napalibutan na ng mga tao dahil sa kaguluhan. Dahil dito, isang pulis ang lumapit. Siya ay nagtanong ng mga impormasyon sa batang lalaki at pagkatapos ay nagtungo sila sa harap ng estasyon. Pinaghintay sila ng pulis dahil siya ay tatawag lamang upang magpahalili.

Inisip ni Aling Marta ang kaniyang pamilya at ang magiging reaksiyon ng kaniyang asawa kapag nalaman nito na nawalan siya ng pera. Biglang nagdilim ang kaniyang paningin, siya'y napuno ng galit at poot. Dahil dito, nagawang saktan ni Aling Marta ang batang lalaki. Gusto lamang makalaya ng batang lalaki sa mahigpit na pagkakahawak ni Aling Marta. Kinagat niya ang kamay ni Aling Marta at tumakbo palayo sa kaniya. Pumunta siya tungo sa isang malawak na daan at biglang may humahagibis na sasakyang bumangga sa kaniya. Hindi makapaniwala si Aling Marta sa nangyari.

Sa kaniyang pag-uwi, sinalubong siya ng kaniyang anak at tinawag nito ang kaniyang ama. Sinabi nilang naiwan ni Aling Marta ang kaniyang pitaka dahil kinuha ito ng kaniyang asawa upang bumili ng tabako. Hindi makapaniwala si Aling Marta sa takbo ng mga pangyayari kaya nawalan siya ng malay.

Maaari ding ipabasa ito sa isang kapamilya, kaibigan o kamag-anak habang pinakikinggan ng mag-aaral.

Gawain 2: Pag-unawa sa Binasa o Napakinggan

Panuto: Sagutin ang mga katanungan tungkol sa binasa o pinakinggang akda. Isulat ang iyong sagot sa sagutang papel.

- 1. Anong halimbawang pangyayari sa tunay na buhay ang maiuugnay mo sa binasa o napakinggang akda?
- 2. Batay sa napakinggan o binasang akda bakit hinimatay si Aling Marta sa dulo ng kuwento? Ipaliwanag sa pamamagitan ng pagbanggit ng ilang mga pangyayari sa daigdig na may kaugnayan sa pangyayari.
- 3. Ano-anong mga panghalip ang giamit sa akda? Magtala ng kahit na lima (5).
- 4. Magsalaysay ng isang pangyayari sa tunay na buhay na may kaugnayan sa binasa o napakinggang akda. Gumamit ng mga panghalip bilang panuring sa tauhan. Isulat ang iyong sagot sa sagutang papel.



Suriin

Binabati kita sa iyong pagsisikap na masagutan ang mga katanungan. Pinatunayan mo na ikaw ay handang humarap sa mga pagsubok dahil ikaw ay nakarating sa bahaging ito ng ating pag-aaral. Magpokus ka lang at magagawa mo ito! Sa bahaging ito, malalaman mo kung paano mabisang magagamit ang panghalip bilang panuring sa mga tauhan para sa isang mabisang pagsasalaysay. Kaya halika na't pag-aralan mo na.

Alam mo bang ang...

isang babasahin o teksto ay binubuo ng magkakahiwalay na mga pangungusap o sugnay? Ang mga pangungusap o sugnay na ito, bagaman magkakahiwalay ay pinagdugtong o pinag-uugnay ng mga **Kohesyong Gramatikal**. Ginagamit na pang-ugnay na ito ay *referents* o reperensiya na kung tawagin ay Anapora at Katapora.

Ang **Anapora** ay mga reperensiyang kadalasan ay panghalip sa hulihang bahagi na tumutukoy sa mga nabanggit na sa unahan ng teksto o pangungusap. *Halimbawa:*

- 1. Karamihan sa mga tao ay ikinakabit ang kulturang Pranses sa <u>Paris</u>. <u>Ito</u> ang sentro ng moda, pagluluto, sining at arkitektura.
- 2. Ang *France* ay mula sa salitang "Francia". Noong panahon ng Iron Age at Roman era, *ito* ay una nang tinawag na Gaul.

Pansinin sa unang halimbawa, ang pangngalang <u>Paris</u> sa unang pangungusap ay hinalinhinan ng pangahalip na <u>ito</u>, samantalang sa ikalawang pangungusap ang <u>France</u> ay pinalitan din ng panghalip na <u>ito</u>.

- 3. Hindi nakapagtataka ang matinding pagnanais ni <u>Mathilde</u> na magkaroon ng magarang damit para sa kasiyahan. <u>Siya</u> ay isang babaeng Frances na kilala sa pagkakaraoon ng pinakamaiinam na moda sa pananamit.
- 4. Marami sa mga kilalang artista ng kasaysayan, kabilang na ang Espanyol na sina <u>Picasso</u> at Dutch-born <u>Vincent van Gogh</u> ay naghanap ng inspirasyon sa Paris, at <u>sila</u> rin ang nagpasimuno ng impressionism movement.

Suriin ang mga panghalip na <u>siya</u> sa ikatlong pangungusap at <u>sila</u> sa ikaapat na halimbawa. Ang mga panghalip na ito ay ginamit bilang panuring sa ngalan ng mga taong binanggit sa unahan. Ang mga ito ay mga **panghalip na ginamit bilang panuring sa tauhan.**

Ang **Katapora** naman ay mga panghalip sa unahang tutukoy sa mga babanggiting Pangngalan sa hulihan ng teksto o pangungusap. *Halimbawa:*

- 1. <u>Sila</u> ay sopistikado kung manamit. Mahilig din sila sa masasarap na pagkain at alak. Ang mga <u>taga-France</u> ay masayahin atmahilig dumalo sa mga kasayahan.
- 2. Labis ang **kaniyang** pagdurusa at paghihinagpis dahil sa may paniniwala **siyang** isinilang **siya** sa daigdig upang magtamasa nang lubos na kaligayahan sa buhay. Taglay ni <u>Mathilde</u> ang alindog na hindi nababagay sa kasalukuyang kalagayan sa buhay.

Sa mga halimbawang binanggit, ang panghalip na <u>sila</u> ay ginamit bilang panuring sa pangngalang <u>taga-France</u> samantalang ang mga panghalip na <u>kaniyang</u>, <u>siyang</u> at <u>siya</u> sa ikalawang halimbawa ay ginamit namang panuring sa pangngalang <u>Mathilde</u>.

Tandaan:

Nakababagot na mabasa at marinig ang mga salitang paulit-ulit na ginagamit sa isang teksto o pahayag. Maiiwasan ito kung gagamit tayo ng panghalip. Ang mga ito'y hindi lamang ginagamit na panghalili sa pangngalang binanggit sa unahan ng pangungusap. Ito'y maaaring ipalit sa pangngalang nasa hulihan din ng pangungusap. **Anapora** ang tawag dito kapag ito ay pamalit o pagpapatungkol sa pangngalang ginamit sa unahan at **Katapora** kapag ito ay pamalit o pagpapatungkol sa pangngalang ginamit sa hulihan nito.

Isagawa mo ang sumusunod na pagsasanay upang mahasa ang iyong kasanayan kung paano mo mabisang magagamit ang panghalip bilang panuring.

Gawain 3: Hanapin ang Panghalip

Panuto: Pumili ng limang (5) pangungusap mula sa bahagi ng maikling kuwentong "Ang Kuwintas" na ginamitan ng panghalip. Pagkatapos, isulat sa patlang sa unahan kung ito ay anapora o katapora. Isulat ang mga sagot sa sagutang papel.

Malamig ang pagtanggap ni Madame Forestier kay Mathilde nang isauli niya ang kuwintas. Nagsalita ito sa tuyot na tinig ng "Isinauli mo sana agad ang kuwintas, baka sakaling kinailangan ko ito". Hindi na binuksan ng kaibigan ang kahon ng kuwintas. Naisip ni Mathilde na kung sakaling nahalata ng kaibigan ang pagkakapalit ng kuwintas, ano kaya ang aakalalin at sasabihin nito sa kaniya? Hindi kaya iisiping siya'y magnanakaw?

ay tinar	a karalitaan. Nabigla siy nggap niya iyon at bud	ya sa bagong papel na kai ong tatag na ginampanan	langan niyang gampanan a. Dapat mabayaran ang
			ilang utusan, lumipat ng sang maliit na silid sa
_	ukan ng isang bahay-pa		sang mami na oma oa
	2		
	3		
	5		
Panuto: Pangnga patlang a sa talaha 1. Pir tu 2. Si isa 3. Na mg 4. Su 5. Hi an 6. Na gu 7. Na 8	lan sa pangungusap. Pat tukuyin kung ito ay zanayan sa inyong sagutanapangarap ma nay na karangyaan. Monsiuer Loisel ay aba ang mabait na asawa. Agningning siya sa pagd ga babae amakay sila sa isang Donanap ag pag-asa ng mag-asawapilitan bumili amawa ng paraan upangangutang sa kung kanimgutang sa kung kanihabag-habag.	ungusap sa bawat bilang. unan ng angkop na Pang Anapora o Katapora. Isula ang papel. aging marangya. Hindi nang tagasulat na napangasiriwang ng palasyo. Natal ay may kaluma ang kuwintas sa kung ya. ng kaparehong kuwintas. g mabili ito. kanino si G. Loisel umanda dahil na rin sa ka	saan-saan man. Naubos Ang mag-asawa ay ay maparaan. ahirapan. Si Mathilde ay
9. M		aibigan sa parke	niya isinalaysay
		on lamang. Ang kuwintas	ay yari lamang sa puwit
ng	g baso.		
Γ	Pangngalan	Panghalip	Kohesiyong Gramatikal (Anapora/Katapora)
1			
2			
3			
4			
5			
7			
8			
9			
	0.		
	· · ·		



Gawain 5: Nauunawaan Ko Na

Panuto: Sagutin ang sumusunod na tanong. Isulat ang iyong sagot sa sagutang papel.

1. Masasalamin ba sa maikling kuwento ang karaniwang buhay ng mga tao sa isang lipunan? Patunayan.

2. Paano nakatutulong ang panghalip sa pagbuo ng pangungusap?



Isagawa

Lalo akong nasisisyahan sa pagpupursiging iyong ipinakikita. Ito ay isang patunay na kayang-kaya mo na. Ngunit huwag ka munang susuko. Tingnan naman natin ang iyong kahusayan sa susunod na gawain. Isagawa ang paglalapat sa hiwalay na sagutang papel.

Gawain 6: GRASPS

Goal	Ikaw ay makasusulat ng sariling maikling wakas ng Maikling wakas n				
Role	Ikaw ay magiging isang manunulat at mananalaysay				
Audience	Guro, mga kapwa mag-aaral.				
Situation	Ipagpalagay na ika'y lalahok sa isang paligsahang magaganap sa iyong paaralan kaugnay ng pagdiriwang ng "Buwan ng Wika". Isasalaysay sa harap ng mga manonood ang inyong ginawang sariling wakas ng kuwento.				
Product	Sariling wakas ng maikling kuwento				
Standards	A. Malinaw na nilalaman				



Mahusay! Binabati kita dahil nakaabot ka sa bahaging ito. Tiyak marami kang natutuhan sa iba't ibang mga aralin sa Modyul na ito. Ngayon, ating tatayahin ang iyong kaalaman sa nakalipas na aralin.

PANGWAKAS NA PAGTATAYA

A. Panuto: Basahin at piliin mo sa Kolum B ang tumutukoy sa mga salitang nasa Kolum A. Isulat ang letra ng tamang sagot sa inyong sagutang papel.

		0 0	•	
		KOLUM A		KOLUM B
	1.	French	A.	Isang mapagmahal na asawa
	2.	Gaul	B.	Pangunahing Relihiyon ng France
	3.	Katoliko	C.	Pagkakapantay-pantay
	4.	Egalite	D.	Matinding patriyotismo
	5.	Crusty baguettes	E.	Isang mapanghalina at sopistikado babae
	6.	Chauvinism		Tinapay na mahaba
		Mathilde		Mayamang ale na may-ari ng alahas
		G. Loisel		Unang tawag sa bansang France
	9.			Sentro ng moda, porma at nauuso
	10.	Paris	J.	Opisyal na wika ng France
В.		mang sagot at isulat ito Ano ang tawag sa isar halaga o diin ay ang ki isang tauhan? A. kuwentong makaba C. kuwento ng tauhan "Lubhang nalibang si na ng madaling araw i lumang dokar na lama ———————————————————————————————————	sa inyong uri ng uri nghay Mathilonang si	Assunod na aytem. Piliin ang letra ng ong sagutang papel. Ing kuwento na ang higit na binibigyang-alaw, ang pagsasalita at pangungusap ng B. kuwento ng katutubong-kulay D. kuwento ng kababalaghan de sa pakikipagsayaw kaya't mag-iikapat lang mag-asawa'y umuwi. Tanging isang g kanilang nasakyan." Ang dokar ay isang B. maliit na bangka D. pampasaherong dyip e ang karukhaan ng kaniyang lumang
		paningin niya ay napa mong gawin para matu A. Hihiwalayan ko as mayaman. B. Titiisin ko na lamar ano ang kaya niyan C. Maghahanap ako mang gumaan ang a	kapang apad ar ng aki ng ang l ng maib ng traba aming l a aking	aho upang matulungan ang aking asawa puhay. g asawa na hindi ako masaya sa uri ng

	4.	kaisipan ng mga taga-France? A. sa kaisipang mapagpalaya at B. sa pag-iisip na sila ay malam C. sa mataas na estado ng pama D. sa kaisipan ng pagkakapatira	aharlika ımuhay
	5.		igan! Ang ipinahiram ko sa iyong Sinong tauhan ang nagturan nito? B. Mathilde Loisel D. Madame Forestier
C.	na letrar sagutang	ng tutugma sa bawat pahayag. papel. Ano ang tawag sa mga salitang g ugnayin ang mga pangungusap?	bawat aytem. Piliin ang pinakaangkop Isulat ang napiling letra sa inyong pinagamit upang pagdugtungin o pag- B. Mga Kohesyong Pahayag D. Gramatikal na Pahayag
	2.	Ito ay reperensiya na kadalasan nabanggit na sa unahan ng teks A. Anapora C. Katapora	ay panghalip na tumutukoy sa mga to o pangungusap. B. Anapora at Katapora D. Kohesyon
	3.	Ito ay reperensiya na bumabangg hulihan pa ng teksto o pangung A. Anapora C. Katapora	rit at tumutukoy sa mga bagay na nasa usap. B. Anapora at Katapora D. Kohesyon
	4.		stikado kung manamit. Ang mga taga- ig dumalo sa mga kasiyahan." Aling lip na <u>sila</u> ? B. France D. Taga-France
	5.		e ay galing sa salitang Francia. Noong era, <u>ito</u> ay tinawag na Gaul. Anong ngguhit sa pangungusap? C. Iron Age D. France
	6.	sa hulihan ng teksto o pangu B. Mga Panghalip sa hulihang Panggalan sa unahan ng teks C. Mga Panghalip sa hulihang tu sa hulihan ng teksto o pangu	tukoy sa mga babanggiting Panggalan ngusap. g tumutukoy sa mga nabanggit na sto o pangungusap. utukoy sa mga babanggiting Panggalan ngusap. g tumutukoy sa mga nabanggit na
	7.		g babae. Si Mathilde ay isinilang sa Anong kohesiyong gramatikal ang C. Panghalip D. Pangngalan

8.	"Si Mathilde ay nagtagumpay sa gabing iyon. Siya ay nagningning sa piging." Anong kohesiyong gramatikal ang nagamit sa pangungusap?						
	A. Anapora	B. Katapora	C. Panghalip	D. Pangngalan			
9.	9. Anong panghalip ang angkop sa patlang ng pangungusap?						
	isa sa mga magaganda't mapanghalinang babae na sa pagkakamali ay isinilang sa angkan ng mga tagasulat.						
	A. Ako'y		C. Kami'y	D. Siya'y			
10. Anong kohesiyong gramatikal ang ginamit sa pangungusap bilang 9?							
	A. Anapora	B. Katapora	C. Panghalip	D. Pangngalan			



Lubos na Mahusay! Ang galing mo! Binabati kita sa matiyaga mong pakikibahagi sa pagtalakay sa mga aralin. Alam kong nakapapagod maglakbay ngunit sulit naman dahil matagumpay mong nalaman ang Maikling Kuwento ng France at ang Panghalip bilang Panuring. Ihanda mo ang iyong sarili sa kasunod na modyul – **Modyul 6 (Nobela mula sa France)**.



Susi sa Pagwawasto

	.iogas gna adi-adi	ISAGAWA Gawain 10: Isalaysay Mo!	
	Iba-iba ang sagot.	ISAGAWA Gawain 9: Dugtungan Mo!	
	lba-iba ang sagot.	PAGYAMANIN Gawain 8: Pag-unawa sa Napakinggan o Nabasa	
γ ·2	Χ · <i>τ</i>	7. X 2. X 1.	
	Iba-iba ang sagot.	SURIIN Gawain 6: Pag-uugnay sa Tunay na Buhay Gawain 7: Kaalaman sa Maikling Kuwento	
	Iba-iba ang sagot.	Gawain 5: Pananaw Ko, Ibabahagi Ko	
	Iba-iba ang sagot.	Gawain 4: Pag-unawa sa Maikling Kuwento	
		2. nakadarama/ kalong	
		weneneq\nignineq\ slealA .4	
		der Standander 22. 742, 242, 242, 242, 242, 242, 242, 242,	
		1. Paghihirap / kakapusan 2. Nagdadalawang-isip	
		Gawain 3: Pagbibigay-kahulugan	
		2' B	
		4. C	
		3. D	
		7. E	
		A . I	
		Gawain 2: Paglinang ng Talasalitaan	
		TUKLASIN TUKLASIN	
	Iba-iba ang sagot.	Gawain 1: Pagsusunod-sunod ng	
		Велікай	

B. Iba-iba ang sagot.

A. Iba-iba ang sagot.

PAUNANG PAGTAYA

ARALIN 1.1 (Panitikan: Ang Kuwintas)

5. nagpapautang nang may mataas na tubo

4. halina / kagandahan

3. nagdadalawang-isip

2. кааwа-аwа

қяјсгя

c.

5. kanilang

3. kaniyang 4. kaniya

otib

l. silang

2.

D.

ARALIN 1.2 (Wika: Panghalip Bilang Panuring sa Tauhan)

BALIKAN
Gawain 1: Hanapin Mo!

Iba-iba ang sagot.

Gawain 1: Hanapin Mo! lba-iba ang sagot

TUKLASIN

Gawain 2: Pag-unawa sa Binasa o Napakinggan Iba-iba ang sagot

SURIIN

Gawain 3: Hanapin ang Panghalip lbd-ibd ang sagot.

Gawain 4: Pagsasanib ng Gramatika at Retorika

Katapora	otl	10. Kuwintas
Anapora	nooU \ otiU	9. Parke
Katapora	Siya	8. Mathilde
Anapora	Siya	7. G. Loisel
Katapora	Silang / Sila	6. Маg-аѕама
Katapora	sliN	5. Маg-аsаwа
Anapora	otI	4. Dokar
Anapora	Roon	3. Palasyo
Anapora	Siya	2. Monsiuer Loisel
Katapora	syiN \ gnsyiN	l. Mathilde
Kohesiyong Gramatikal	Panghalip	Pangngalan

ISASIP Gewein 5: Newneed Ko N

Gawain 5: Nauunawaan Ko Na

ISAGAWA

Gawain 6: GRASPS

Gawain 6: GRASPS

PANGWAKAS NA PAGTATAYA

10.B	2. D	2. D	1 .01	5. F
9. D	4. D	∀ B	9. G	4. C
A .8	3. C	3. C	A .8	3. B
7. B	Α .Δ	ΑΔ	7. E	Ъ. Н
e. B	A .I	J. C	e. D	l. J
	c.	B.		.A

Sanggunian

Ambat, V.C., et.al (2015). *Filipino 10 Modyul para sa Mag-aaral – Ang Kuwintas*. Pasig City: Vibal Group, Inc. pa. 57-72.

French Culture: Customs and Traditions – Live Science. Nahango noong Mayo 15, 2020 mula sa https://www.livescience.com/39149-french-culture.html

Buod ang Kuwintas. Nahango noong Mayo 15, 2020 mula sa https://brainly.ph/question/385347

Ang Kuwintas. Nahango noong Mayo 15, 2020 mula sa https://www.youtube.com/watch?v=SCUprYhoT6I

France. Nahango noong Mayo 20, 2020 mula sa https://en.m.wikipedia.ord/wiki/France

Anapora at Katapora. Nahango noong Mayo 20, 2020 mula sa https://www.slideshare.net/mobile/teodosiojohnanthony/anapora-at-katapora

Ang Kalupi. Nahango noong Hunyo 29, 2020 mula sa https://lynonnerhyme.wordpress.com/2018/11/22/buod-ng-ang-kalupi-ni-benjamin-pascual/

Kabuluhan ng Buhay. Nahango noong Hunyo 29, 2020 mula sa https://emmarflojo2892.blogspot.com/2012/08/kwento-ng-tauhan-kabuluhanng-buhay-ni.html

Pagbibigay kahulugan sa pagbasa. Nahango noong Hunyo 29, 2020 mula sa https://www.slideshare.net/jericlazo716/filipinopagbibigay-kahulugan-sa-pag

Impeng negro Maikling Buod. Nahango noong Hunyo 29, 2020 mula sa https://brainly.ph/question/874862

Ramos, Ernesto Jr., *Larawan ng Mathilde*. Nahango mula sa https://www.kidsworldfun.com/short-stories/the-necklace-by-guy-de-maupassant.php

Dominguez et.al (1990). Hiyas ng Wika: Abiva Publishing

Para sa mga katanungan o puna, sumulat o tumawag sa:

Department of Education - Bureau of Learning Resources (DepEd-BLR)

Ground Floor, Bonifacio Bldg., DepEd Complex Meralco Avenue, Pasig City, Philippines 1600

Telefax: (632) 8634-1072; 8634-1054; 8631-4985

Email Address: blr.lrqad@deped.gov.ph * blr.lrpd@deped.gov.ph